

Trei indicazioni per la PAT

Formazion professionèla, cognoscenta di lengac e sostegn a la families l'é i temes di 3 ordegn del dì che l conseier Luigi Chiocchetti à portà dant te la discuscion de la "Finanziaria"

Politica - En ocajon de la discuscion tel Consei de la Provinzia de Trent de la "Finanziaria" l conseier Luigi Chiocchetti à portà dant 3 ordegn del dì. L prum domana che vegne metù a jir azions per engaissèr i joegn a se dèr jù te l'artejanat, l secont vel smaorèr la cognoscenta di lengac ence travers i viajes de studie a la foresta e l terz domana che vegne metù en दौरa politiches di priesc che deide la families, soraldut cheles con n muie de fies.

Per chel che vèrda l'artejanat, Chiocchetti à recordà l gran empegn tel setor de l'istruzion e formazion professionèla portà inant da la Provinzia de Trent, con intervenc che vel valorisèr i talenc de nesc joegn e portèr inant n dessegn strategich per na economia locala competitiv.

Aldò de chest per cont de Chiocchetti l'é de besegn de pontèr amò de più su l'integrazion del sistem anter istruzion e formazion professionèla, vardan de troèr i strumenc che ge consente ai joegn de se arvejinèr a l'ativitèdes leèdes al teritorie, desche chela di bachegn e de l'artejanat. Per chest l conseier de la UAL ge à domana a la Jonta

de la PAT che vegne sostegnù e slarià fora la comunicazion sui intervenc de promozion per projec de formazion professionèla, realisé diretament ence travers la colaborazion con la scoles o porté dant da sociazions o enc privac.

En cont de la cognoscenta di lengac, Chiocchetti pea via da l'emportanza semper maora de chesta competenza, aldò di orientamenc europeans, per domanèr che vegne metù atenzion particulèra de chest vers ti pians de studie provinzièi per jir envers la internazionalisazion de la scola trentina, en particulèr per chel che vèrda l'ingleis. L conseier domana ence che ge vegne dat maor lèrga a stage e barac anter studenc e dozenc, con l'obietif de slarièr fora l'ensegnament di lengac foresc enscin da la scolina e l sotrissea la valuta per i studenc de fèr na sojornanza de studie a la foresta, no demò per emparèr l lengaz ma ence per cognoscer cultures desvalives e fèr na esperienza formativa globala, domana che la Provinzia perveide l sostegn finanzièl de chesta scomenzadives. Chiocchetti domana amò apede che vegne pervedù n pian

straordenèr per ge permeter a duc i sentadins de tor pèrt a corsc e jir a la foresta a emparèr i lengac.

L'ùltim orden del dì de Chiocchetti é leà al moment de crisa economica, olache i intervenc de la PAT é ouc al sostegn a l'ocupazion, ence con mesures straordenères sui investimenc per didèr i imprenditores, e al didament de la fasces sozièles più déboles. De chest vers en particulèr l'é pervedù l potenziament di servijes per la families zenza smaorèr la speises e i contribuc per i cosc de l'energia e per i mutui de pruma cèsa.

Chiocchetti de chest vers vel meter l'atenzion su la families, per sostegnir chesta pèrt fondamentèla de noscia sozietà ence travers politiches di priesc e de tasses adatèdes, soraldut se te cèsa l'é n muie de fies o componenc con problemes o pedimenc. Per chest l conseier domana che vegne mudà fora l sistem de valutazion ICEF, che vegne tegnù cont de la indicazioni del Forum de la Sociazions de la families del Trentin e che vegne envià ence la aministrazions de comun a jir de chest vers.